



Broj: UP1 03-1-37-7-4/12
Sarajevo, 08.02.2012. godine.

Agencija za zaštitu ličnih podataka u Bosni i Hercegovini, rješavajući po službenoj dužnosti predmetu objavljivanja ličnih podataka lica koja su ostvarila pojedina prava propisana Zakonom o dopunskim pravima boraca – branitelja Bosne i Hercegovine („Sl. novine Kantona Sarajevo“ broj 09/07 – Prečišćeni tekst, 07/08 i 33/08) na službenoj internet stranici Ministarstva za boračka pitanja Kantona Sarajevo www.mbp.ks.gov.ba, na osnovu člana 61. Zakona o upravi („Službeni glasnik BiH“, broj 32/02 i 102/09) i člana 40. stav (1) tačka a) Zakona o zaštiti ličnih podataka („Službeni glasnik BiH“, broj 49/06 i 76/11), *donosi*:

RJEŠENJE

- I. Zabranjuje se Ministarstvu za boračka pitanja Kantona Sarajevo da na službenoj internet stranici Ministarstva www.mbp.ks.gov.ba, u dnevnim novinama, na oglasnim pločama Kantona, info – punktu Ministarstva, sjedištima kantonalnih boračkih udruženja i službama za boračko – invalidsku zaštitu svih općina Kantona objavljuje lične podatke lica u postupku ostvarivanja prava propisanih članom 5. Zakona o dopunskim pravima boraca – branitelja Bosne i Hercegovine.
- II. Zabranjuje se Ministarstvu za boračka pitanja Kantona Sarajevo obrada ličnog podatka JMB prilikom podnošenja zahtjeva za ostvarivanje prava propisanih članom 5. Zakona o dopunskim pravima boraca – branitelja BiH.
- III. Nalaže se Ministarstvu za boračka pitanja Kantona Sarajevo blokiranje i brisanje sa službene internet stranice www.mbp.ks.gov.ba do sada objavljenih ličnih podataka lica u postupku ostvarivanja prava propisanih članom 5. Zakona o dopunskim pravima boraca – branitelja BiH, blokiranje, brisanje i uništavanje do sada prikupljenih JMB podnosioca zahtjeva u postupku ostvarivanja propisanih prava i uništavanje do sada objavljenih listi na oglasnim pločama Kantona, info – punktu Ministarstva, sjedištima kantonalnih boračkih udruženja i službama za boračko – invalidsku zaštitu svih općina Kantona, a koje sadrže lične podatke lica u postupku ostvarivanja prava propisanih članom 5. Zakona o dopunskim pravima boraca – branitelja Bosne i Hercegovine.
- IV. Ministarstvo za boračka pitanja Kantona Sarajevo je dužno u roku od 15 dana od dana prijema ovog Rješenja pismeno obavjestiti Agenciju za zaštitu ličnih podataka u BiH o poduzetim mjerama u vezi sa provođenjem tačke I., II. i III. dispozitiva.

Obrazloženje

Agencija za zaštitu ličnih podataka u Bosni i Hercegovini, (u daljem tekstu: Agencija), je uočila da su na službenoj internet stranici Ministarstva za boračka pitanja Kantona Sarajevo www.mbp.ks.gov.ba objavljene liste lica koja su ostvarila pojedina prava propisana Zakonom o dopunskim pravima boraca – branitelja Bosne i Hercegovine, („Sl. novine Kantona Sarajevo“ broj 09/07 – Prečišćeni tekst, 07/08 i 33/08; u daljem tekstu: Zakon o dopunskim

pravima), u 2010. i 2011. godini. Postupajući po službenoj dužnosti Agencija je pokrenula postupak kontrole zakonitosti obrade ličnih podataka od strane Ministarstva za boračka pitanja Kantona Sarajevo.

Aktom broj: 03-1-37-7-598-1/11 od 28.11.2011. godine, Agencija je od Ministarstva za boračka pitanja Kantona Sarajevo (u daljem tekstu: Ministarstvo) zatražila informaciju o pravnom osnovu i svrsi objave dokumenata u kojima se obrađuju podaci o imenu i prezimenu, imenu oca, JMB, adresi i općini prebivališta podnosioca zahtjeva (šehidske porodice/podriđice poginulih boraca, RVI, demobiliziranih boraca, učenika – zajedno sa podacima za staratelja, studenata i raseljenih lica) i iznos dodjeljenih sredstava. Ministarstvo je bilo obavezno dostaviti informaciju u roku od 7 dana.

Ministarstvo je, dana 05.12.2011. godine, Agenciji dostavilo akt broj: 06-41-30628/11 od 01.12.2011. godine u kojem se navodi da su liste sa ličnim podacima lica koja su ostvarila prava propisana Zakonom o dopunskim pravima u 2010. i 2011. godini objavili na službenoj internet stranici Ministarstva, u dnevnim novinama i na oglasnoj tabli Ministarstva u svrhu uvida javnosti i mogućnost podnošenja prigovora na iste. Kao pravni osnov za njihovo objavljivanje navedeni su:

- član 8. Uredbe o načinu i uvjetima rješavanja stambenih potreba boraca – branitelja Bosne i Hercegovine („Sl. novine Kantona Sarajevo“ broj 31/07, 23/09 i 10/11),
- član 6. Uredbe o načinu i uslovima ostvarivanja prava na dodjelu stipendija borcima – braniteljima Bosne i Hercegovine i njihovoj djeci („Sl. novine Kantona Sarajevo“ broj 24/02, 23/04, 22/07 i 32/08), i
- član 7. stav (4) Uredbe o načinu, uvjetima i kriterijima za ostvarivanje prava na snošenje troškova plaćanja naknade za građevinsko zemljište za izgradnju individualnih stambenih objekata za potrebe boraca - branitelja Bosne i Hercegovine („Sl. novine Kantona Sarajevo“ broj 18/09 i 10/11).

Na kraju izjašnjenja je navedeno da je Javnim pozivom za ostvarivanje pojedinačnih prava propisanih Zakonom o dopunskim pravima predviđena objava listi i na službenoj internet stranici Ministarstva te da je prilikom podnošenja zahtjeva potrebno prilažiti ovjerenu izjavu kojom se u skladu sa članom 5. stav (2) Zakona o zaštiti ličnih podataka daje saglasnost Ministarstvu za obradu ličnih podataka podnosioca zahtjeva u postupku rješavanja i da iste može objaviti.

U provedenom postupku Agencija je utvrdila sljedeće:

Ministarstvo na službenoj internet stranici objavljuje liste sa ličnim podacima lica koja su podnijela zahtjev za ostvarivanje nekog od prava propisanih članom 5. stav (1) tačke 8), 13), 14) i 15) Zakona o dopunskim pravima u 2010. i 2011. godini. Radi se o objavi imena i prezimena, imena oca, JMB, adresi i općini prebivališta podnosioca zahtjeva i iznosu dodjeljenih sredstava. Kao pravni osnov za objavu su navedene Uredba o načinu i uvjetima rješavanja stambenih potreba boraca – branitelja Bosne i Hercegovine, Uredba o načinu i uslovima ostvarivanja prava na dodjelu stipendija borcima – braniteljima Bosne i Hercegovine i njihovoj djeci i Uredba o načinu, uvjetima i kriterijima za ostvarivanje prava na snošenje troškova plaćanja naknade za građevinsko zemljište za izgradnju individualnih stambenih objekata za potrebe boraca - branitelja Bosne i Hercegovine.

*Sarajevo-Sarajevo, Vilsonovo šetalište broj 10. -Вилсоново шеталиште број 10.,
Tel/ Тел ++387 33 726 250, fax/ Фак 726 251*

Zakonom o dopunskim pravima se uređuju prava, uvjeti i postupak za ostvarivanje prava, korištenje i prestanak prava, sredstva za finansiranje prava, kao i druga pitanja od značaja za ostvarivanje prava lica na koja se ovaj zakon odnosi, a to su ratni vojni invalidi i članovi njihovih porodica, članovi porodica šehida..., a sve u skladu sa raspoloživim budžetskim sredstvima. Za nevedena lica je članom 5. stav (1) tačke 8), 13), 14) i 15) Zakon o dopunskim pravima propisano, između ostalih pravo na stipendiranje, pravo na novčane pozajmice i dodjelu sredstava za rješavanje stambenih potreba, pravo na dodjelu sredstava za održivi povratak i pravo na stan u vlasništvu.

Prema člana 3. stav (1) alineja 1. Zakona o zaštiti ličnih podataka ("Sl. glasnik BiH", broj 49/06, 76/11 i 89/11; u daljem tekstu: Zakon), „*lični podaci znače bilo koju informaciju koja se odnosi na fizičko lice koje je identificirano ili se može utvrditi identitet lica*“, dok prema alineji 5. istog stava i člana „*obrada ličnih podataka podrazumijeva bilo koju radnju ili skup radnji koje se vrše nad podacima, bilo da je automatska ili ne, a posebno prikupljanje, unošenje, organiziranje, pohranjivanje, prerađivanje ili izmjenu, uzimanje, konsultiranje, korištenje, otkrivanje prijenosom, širenje ili na drugi nain omogućavanje pristupa podacima, svrstavanje ili kombiniranje, blokiranje, brisanje ili uništavanje*“.

U alineji 7. istog stava i člana je propisano da je „*kontrolor svaki javni organ, fizičko ili pravno lice, agencija ili drugi organ koji samostalno ili zajedno s drugim vodi, obrađuje i utvrđuje svrhu i način obrade ličnih podataka na osnovu zakona ili propisa*“.

U konkretnom slučaju, Ministarstvo je kontrolor u smislu člana 3. Zakona i obrađuje lične podatke objavljivanjem listi lica koja su ostvarila prava propisana Zakonom o pravima u 2010. i 2011. godini, lica koja imaju potpunu dokumentaciju za ostvarivanje prava propisanih zakonom u 2010. i 2011. godini a kojima se nije moglo udovoljiti zbog ograničenih budžetskih sredstava i lica koja ne ispunjavaju uvjete za ostvarivanje prava propisanih zakonom u 2010. i 2011. godini na internet stranici Ministarstva u kojima se obrađuju gore navedeni podaci.

Zakon u članu 4. stav (1) tačka a) (Principi obrade ličnih podataka) propisuje da je kontrolor obavezan da „*lične podatke obrađuje na pravičan i zakonit način*“.

Shodno principu pravičnosti i zakonitosti, da bi kontrolor mogao objavljivati ime i prezime, ime oca, JMB, adresu i općinu prebivališta podnosioca zahtjeva i iznos dodjeljenih sredstava na službenoj internet stranici Ministarstva, na oglasnim pločama Kantona, info – punktu Ministarstva, sjedištima kantonalnih boračkih udruženja i službama za boračko – invalidsku zaštitu svih općina Kantona, onda njegovo pravo, odnosno obaveza da čini navedenu radnju, **mora biti propisana zakonom ili propisom donesenim na osnovu zakona.**

Zakonom o dopunskim pravima je propisano da će Vlada Kantona Sarajevo posebnim propisom utvrditi način i uvjete za ostvarivanje prava ili će ministar za boračka pitanja posebnim pravilnikom urediti način, uvjete i kriterije prvenstva za ostvarivanje prava propisanih članom 5. To podrazumjeva radnje koje podnosilac zahtjeva i Ministarstvo moraju poduzeti prije izbora korisnika prava kao i kriterije koji moraju biti zadovoljeni za ostvarivanje prava. Međutim, ostvarivanje prava propisanih članom 5. Zakona o dopunskim

pravima, ne može biti uslovljeno objavljivanjem liste sa ličnim podacima korisnika prava na službenoj internet stranici Ministarstva i oglasnim pločama.

U konkretnom slučaju, Vlada Kantona Sarajevo je donijela sljedeće propise:

- Uredba o načinu i uslovima ostvarivanja prava na dodjelu stipendija borcima – braniteljima Bosne i Hercegovine i njihovoj djeci („Sl. novine Kantona Sarajevo“ broj 24/02, 23/04, 22/07 i 32/08), koja u članu 6. stav (2) propisuje da je „*Fond "IKRE je dužna, po obavljenom odabiru kandidata, u dnevnom listu u kojem je Konkurs za dodjelu stipendija bio objavljen, objaviti svoju odluku i spisak svih izabranih kandidata za stipendiranje.*“,
- Uredba o načinu i uvjetima rješavanja stambenih potreba boraca – branitelja Bosne i Hercegovine („Sl. novine Kantona Sarajevo“ broj 31/07, 23/09 i 10/11) koja u članu 8. stav (1) tačka c) propisuje da „*stručna služba Ministarstva obrađuje sve prispjele zahtjeve i sa svojim stručnim mišljenjem dostavljaju ih Komisiji za rješavanje zahtjeva za odobravanje novčanih pozajmica (u daljnjem tekstu: Komisija) radi formiranja liste lica koja ispunjavaju uvjete za novčanu pozajmicu*“ dok je tačkom d) propisano da „*na listu iz tačke c) ovog člana može se podnijeti prigovor ministru za boračka pitanja Kantona (u daljnjem tekstu: ministar) u roku do 21 dan od dana objavljivanja iste na oglasnim pločama Kantona, info – punktu Ministarstva, web stranici Kantona, sjedištima kantonalnih boračkih udruženja i službama za boračko – invalidsku zaštitu svih općina Kantona. Rješenje koje ministar donese po prigovoru je konačno*“,
- Uredba o dodjeli sredstava za održivi povratak („Sl. novine Kantona Sarajevo“ broj 17/03, 27/04 i 17/07) koja u članu 8. stav (1) tačka 2) propisuje da „*stručna služba Ministarstva za boračka pitanja Kantona obrađuje sve prispjele zahtjeve i priprema prijedlog odluke sa stručnim mišljenjem o opravdanosti zahtjeva*“,
- Uredba o načinu, uvjetima i kriterijima za ostvarivanje prava na snošenje troškova plaćanja naknade za građevinsko zemljište za izgradnju individualnih stambenih objekata za potrebe boraca - branitelja Bosne i Hercegovine („Sl. novine Kantona Sarajevo“ broj 19/08, 18/09 i 10/11) koja u članu 7. stav (4) propisuje da „*Stručna služba Ministarstva obrađuje svaki prispjeli zahtjev pojedinačno i sa svojim stručnim mišljenjem dostavlja ih Komisiji za ostvarivanje prava na snošenje troškova plaćanja naknade za građevinsko zemljište za izgradnju individualnih stambenih objekata za potrebe boraca - branitelja Bosne i Hercegovine (u daljnjem tekstu: Komisija) radi formiranja liste lica koja ispunjavaju uvjete za snošenje troškova plaćanja naknade za građevinsko zemljište za izgradnju individualnih stambenih objekata za potrebe boraca - branitelja Bosne i Hercegovine, a na koju se može podnijeti prigovor ministru za boračka pitanja Kantona u roku do 21 dan od dana objavljivanja iste na oglasnim pločama Kantona, info-punktu Ministarstva, sjedištima kantonalnih boračkih udruženja i službama za boračko-invalidsku zaštitu svih općina Kantona i web stranici Kantona. Rješenje koje ministar donese po prigovoru je konačno.*“ , i
- Pravilnik za dodjelu stana u vlasništvo („Sl. novine Kantona Sarajevo“ broj 26/09 i 01/10) koji u članu 10. stav (2) propisuje da „*Stručna služba Ministarstva obrađuje svaki prispjeli zahtjev pojedinačno i utvrđuje listu lica koja ostvaruju pravo na dodjelu stanova na bazi kriterija utvrđenih ovim Pravilnikom*“, donesen od strane ministra za boračka pitanja Kantona Sarajevo.

Zakon o dopunskim pravima nije propisao objavljivanje ličnih podataka izabranih korisnika prava na službenoj internet stranici Ministarstva i istim nije ostavljena mogućnost da podzakonskim aktom bude propisana njihova objava. Navedenim zakonom je propisano da će se posebnim aktom utvrditi načini ostvarivanja prava i uvjeti koje je potrebno zadovoljiti da bi se ostvarilo neko od prava. Shodno navedenom, uredbe donesene od strane Vlade Kantona Sarajevo i pravilnik donesen od strane ministra za boračka pitanja Kantona Sarajevo nisu u skladu sa principom pravičnosti i zakonitosti kao jednim od osnovnih principa obrade ličnih podataka. Naime, neosporno je da Ministarstvo, putem kojeg se vrši ostvarivanje prava propisanih članom 5. Zakona o dopunskim pravima, mora obavjestiti podnosiocima zahtjeva koji su ostvarili svoja prava putem Javnog konkursa. Međutim, način na koji je to urađeno nije u skladu sa navedenim principom. Objavljivanje ličnih podataka na službenoj internet stranici i oglasnim pločama predstavlja kršenje prava na privatnost lica na koje se ti podaci odnose. Navedenim objavljivanjem lični podaci na ovaj način postaju dostupni neograničenom broju korisnika.

Pošto se radi o ostvarivanju zakonom propisanih prava, to je Ministarstvo kao organ uprave dužno postupati po Zakonu o upravnom postupku u FBiH („Sl. novine FBiH“ broj: 2/98 i 48/99; u daljem tekstu ZUP FBiH). Način na koji se stranke u postupku i ostala lica obavještavaju o toku postupka propisan je članom 79. ZUP-a FBiH. Prema navedenom članu, stranke (podnosioci zahtjeva za ostvarivanje prava) imaju pravo razgledati spise predmeta pod nadzorom određene službene osobe i o svom trošku izvršiti prepis tih dokumenata, a organ koji vodi postupak je obavezan da im to omogući. Navedeno pravo ima i svaka druga osoba koja učini vjerovatnim svoj pravni interes. Zahtjev za razgledanje i prepisivanje spisa može se staviti i usmeno, a navedenim članom su propisana i ograničenja u pogledu službenih dokumenata koji se ne mogu razgledati i prepisivati. Stranka i svaka druga osoba koja učini vjerovatnim svoj pravni interes u predmetu ima pravo obavještavati se o toku postupka, a ukoliko im organ koji vodi postupak to odbije dopuštena je posebna žalba. Ovo znači da organ koji vodi upravni postupak ne obavještava o toku postupka „cjelokupnu javnost“ u svrhu podnošenja prigovora na istu, kako je to navedeno u dopisu Ministarstva, već samo stranke koje učestvuju u postupku i osobe koje dokažu svoj pravni interes. Na ovaj način se osigurava zakonitost upravnog postupka. Dakle, pogrešno je tumačenje da se pod pojmovima „svi“ ili „zainteresirano lice“, u određenim materijalnim propisima, podvodi znatizelja lica. Ovo pravo je ograničeno na stranke u postupku i ona lica koja dokažu svoj pravni interes u istom što je, svakako, u skladu i sa osnovnim principima zaštite ličnih podataka.

Način na koji se vrši dostavljanje pismena strankama u toku postupka propisan je članom 80. ZUP-a FBiH koji u stavu (1) propisuje da se „*dostavljanje pismena (poziva, rješenja, zaključaka i drugih službenih spisa) vrši se, po pravilu, tako što se pismeno predaje osobi kojoj je namijenjeno*“. Istim članom su propisani i načini dostavljanja pismena.

Shodno navedenom, Ministarstvo, nakon provedenog upravnog postupka i na osnovu unaprijed zadanih kriterija, pismenom obavještava stranke u postupku o donesenoj Odluci po Javnom pozivu za ostvarivanje nekog od prava iz člana 5. Zakona o dopunskim pravima i ostavlja im period u kojem mogu dostaviti prigovor na takvu Odluku.

Prilikom omogućavanja pristupa informacijama „cjelokupnoj javnosti“, koje sadrže lične podatke korisnika prava propisanih članom 5. Zakona o dopunskim pravima, potrebno je da Ministarstvo primjenjuje odredbe Zakona o slobodi pristupa informacijama u Federaciji Bosne i Hercegovine i Zakona.

Pravo pristupa informacijama koje su pod kontrolom javnog organa propisan je Zakonom o slobodi pristupa informacijama u Federaciji Bosne i Hercegovine („Sl. novine FBiH“ broj: 32/01). Međutim, sloboda pristupa informacijama nema prioritet nad pravom na privatnost. Shodno navedenom, članom 54. Zakona je propisano: „*Odredbe ovog Zakona uzet će se u obzir prilikom primjene Zakona o slobodi pristupa informacijama*“.

Kako član 8. Zakona o slobodi pristupa informacijama propisuje: „*Nadležni javni organ utvrđuje izuzetak od priopćavanja tražene informacije, ako osnovano utvrdi da informacija uključuje lične interese koji se odnose na privatnost treće osobe*“, to iz navedenog proizilazi zaključak da je član 8. navedenog zakona upućujuća norma na član 17. Zakona, kojim su propisani uvjeti za davanje ličnih podataka trećoj strani, a koji su u smislu člana 4. Zakona o slobodi pristupa informacijama, fizička i pravna lica.

Shodno tome, Ministarstvo, kao kontrolor ličnih podataka, po prijemu **pisanog zahtjeva** za pristup ličnim podacima od strane fizičkih i pravnih lica, a koji mora sadržavati svrhu i pravni osnov za korištenje ličnih podataka, te vrste ličnih podataka koji se traže, ovlašten je prema članu 17. stav (2) Zakona, lične podatke dati na korištenje trećoj strani ako je to potrebno radi obavljanja poslova u okviru zakonom utvrđene nadležnosti ili ostvarivanja zakonitih interesa treće strane, ili pribaviti saglasnost nosioca podataka. Postupajući na navedeni način, kontrolor ličnih podataka će utvrditi da li su ispunjeni uvjeti iz člana 17. stav (4) Zakona, odnosno da li postoji saglasnost za davanje podataka od strane nosioca podataka ili je ispunjen jedan od uvjeta iz člana 6. Zakona kojim su definirani uvjeti pod kojim se lični podaci mogu obrađivati bez saglasnosti nosioca podataka.

U slučaju kada kontrolor ličnih podataka utvrdi da nisu ispunjeni uvjeti iz člana 17. Zakona (Davanje ličnih podataka trećoj strani), potrebno je da u skladu sa članom 9. Zakona o slobodi pristupa informacijama izvrši ispitivanje da li postoji javni interes za dostavu traženih podataka iz evidencije, pri tome uzimajući u obzir svaku korist i štetu koje mogu proisteći iz priopćavanja informacija. U konkretnom slučaju, shodno članu 9. stav (2) Zakona o slobodi pristupa informacijama, kontrolor ličnih podataka prilikom donošenja odluke da li je dostavljanje traženih podataka o dobitnicima stipendije opravdano javnim interesom, treba razmotriti sve okolnosti koje idu u prilog ili su protivne, a naročito uključujući: svako nepoštivanje zakonske obveze, postojanje bilo kakvog prijestupa, nepravde, zlouporabe vlasti ili nemara u obavljanju službene dužnosti, neovlaštenog korištenja javnih fondova, opasnosti po zdravlje ili sigurnost pojedinca, javnosti ili okoline.

Iz tog razloga je potrebno da se Ministarstvo, kao javni organ, prilikom davanja podataka trećoj strani koja sadrži i lične podatke lica, pridržava odredbi Zakona o slobodi pristupa informacijama u FBiH i Zakona.

Europska konvencija o zaštiti ljudskih prava i osnovnih sloboda, koja je sastavni dio Ustava BiH, u članu 8. propisuje zaštitu prava na privatnost, koja omogućava jednoj osobi da bude zaštićena od ometanja od strane drugih pojedinaca, institucija i sredstava masovnih komunikacija, te kao takva ima veću pravnu snagu u primjeni u odnosu na sve ostale propise. Stoga, objavljivanje listi sa ličnim podacima lica u postupku ostvarivanja prava propisanih članom 5. Zakona o dopunskim pravima na službenoj internet stranici Ministarstva i na oglasnim pločama, predstavlja miješanje u pravo na privatni život lica čiji se podaci obrađuju u listama, a koje je zagarantirano članom 8. stav (1) Europske konvencije o zaštiti ljudskih prava i osnovnih sloboda.

Nadalje, Bosna i Hercegovina kao članica Vijeća Europe mora se pridržavati propisa koji su doneseni od tog tijela. U brizi za zaštitu privatnosti Vijeće Europe je donijelo Konvenciju o zaštiti prava pojedinaca u pogledu automatske obrade ličnih podataka (ETS br.108) koja propisuje opći pravni okvir zaštite podataka o ličnosti. Također, u članu 3. Konvencije Vijeća Europe o pristupu zvaničnim dokumentima su propisana eventualna ograničenja na pristup, a koja će biti postavljena u skladu sa zakonom, koja su neophodna u demokratskom društvu i koja će biti srazmjerna cilju zaštite i jedno od propisanih ograničenja je u cilju zaštite privatnosti i drugih legitimnih privatnih interesa. Ista odredba je navedena i u Preporuci R(81)19 Komiteta ministara Vijeća Europe državama članicama o pristupu informacijama u posjedu javnih vlasti, koja afirmira pravo, ali utvrđuje i granice dostupnosti informacija koje nastaju radom organa uprave.

Na osnovu gore navedenih međunarodnih propisa usaglašeni su i domaći propisi u oblasti pristupa informacijama i zaštiti podataka o ličnosti, a to su Zakon o slobodi pristupa informacijama u FBiH i Zakon.

Prema članu 18. stav (1) Zakona o jedinstvenom matičnom broju („Sl. glasnik BiH” broj 32/01, 63/08 i 103/11), kontrolor može obrađivati JMB samo ako je to zakonom izričito propisano. Kako Zakon o pravima nije propisao obradu JMB u svrhu ostvarivanja prava propisanih članom 5. zakona, a sa druge strane Zakon o jedinstvenom matičnom broju BiH kao *lex specialis* izričito zabranjuje ovakvu obradu osim u zakonom propisanim slučajevima, to je utvrđeno da Ministarstvo obrađuje JMB protivno principu iz člana 4. stav (1) tačka a) Zakona, kojim je propisano da je kontrolor dužan da lične podatke obrađuje na pravičan i zakonit način.

S obzirom na navedeno utvrđeno je da Ministarstvo za boračka pitanja Kantona Sarajevo objavljuje liste u kojima obrađuje lične podatke o imenu i prezimenu, imenu oca, JMB, adresi i općini prebivališta podnosioca zahtjeva i iznosu dodjeljenih sredstava lica u postupku ostvarivanja prava propisanih članom 5. Zakona o dopunskim pravima na službenoj internet stranici www.mbp.ks.gov.ba, u dnevnim novinama, na oglasnim pločama Kantona, info – punktu Ministarstva, sjedištima kantonalnih boračkih udruženja i službama za boračko – invalidsku zaštitu svih općina Kantona, protivno principu iz člana 4. stav (1) tačka a) Zakona, koji obavezuje kontrolore da lične podatke obrađuju na pravičan i zakonit način.


Na osnovu naprijed navedenog, a u skladu sa članom 40. stav (2) tačka e) i članom 41. stav (1) Zakona, riješeno je kao u dispozitivu ovoga rješenja.

Pouka o pravnom lijeku:

Protiv ovog rješenja nije dopuštena žalba ali se može pokrenuti upravni spor pred Sudom Bosne i Hercegovine u roku od 60 dana od dana dostave rješenja.

Dostavljeno:

- Ministarstvo za boračka pitanja Kantona Sarajevo
Ul. Džemaludina Čauševića br.1
71000 Sarajevo
- a/a



DIREKTOR

Petar Kovačević

Sarajevo-Capajeso, Vilsonovo šetalište broj 10. -Вилсоново шеталиште број 10.,
Tel/ Ten ++387 33 726 250, fax/ Фак 726 251